

Ün nouv crimi per giuvenils e lur magistras

«Affers da famiglia» ho nom il prüm crimi per giuvenils da Gianna Duschletta. Ill'intervista tradischa l'autura da S-chanf l'intent da quist cudesch, sia metoda da scriver e perche chi drouva dapü litteratura putera.

FADRINA HOFMANN

Gianna Duschletta, «Affers da famiglia es güsta cumparieu. Perche as scriva ün crimi per giuvenils in puter? Perche cha eau d'he stuvieu fer üna lavur da master e lura d'he penso ch'eu pudess bain fer qualchosa ch'eu fetsch gugent e chi güda eir ad ota glieud ed ad otras magistras chi instrueschan lectüra sül s-chelin ot.

Cu funcziuna il process da scriver ün crimi? Eau guard e leg gugent istorgias criminelas. Eau d'he let ün cudesch chi ho do ün po cussagls e propostas per üna via. Ma eau d'he impustüt gieu sairedas da discussiun cun mia famiglia vi da maisa inua cha vainsa elavuro il plot e discus che chi pudess capiter e che chi füss interessant. Uschè es naschida quista istorgia.

Dimena eir cò il resultat dad ün «affer da famiglia». Per che vo que illa istorgia? Üna giuvna chi vo in muntagna chat-ta üna buscha ed in quella buscha es aint üna fotografia. Ella vuless chatter oura che chi'd es cun quella fotografia, Perche es sü lo ün giuven ed



Gianna Duschletta ho scrit sieu prüm crimi per giuvenils cun nom «Affers da famiglia».



fotografias: Chesa Editura Rumantscha/Fadrina Hofmann

ün'alp chi'd es arsa? Che ho que da-chefer cun ün invol ch'i'd es capito a la banca da Samedan? Pass per pass scuvrescha ella cun agüd dad otras personas involvedas tuot que chi'd es capito. In fuond ho tuot da chefer ün cun l'oter.

Perche es il crimi situo in Engiadin'Ota? Eau cugnusch bain ils contuorns da S-chanf e Zuoz ed uschè es que capito bod automaticamaing. L'istorgia es situada in muntagna, traunter las alps da Zuoz. Eau d'he penso cha in quist ambiaint pudess capiter qualchosa plü speciel cu be in cumün.

Cun sföglier il cudesch daun in ögl differentas fuormas da text, traunter oter messagis cuorts u ün blog. D'eira Sieu intent da scriver pü dasper pussibel a la realited dals giuvenils? Schi, quello dad üna vart. Da l'otra vart es que eir per fer ün po pü interessant pels giuvenils. Eau d'he fat l'ex-perienza cha giuvenils nu's rivan da motiver per ler texts plü lungs. L'atten-ziun svanescha svelt. Cun müder adüna darcho qualchosa do que müda-maint, id es adüna darcho qualchosa nouv chi svaglia l'attenziun. Our da la vista da la magistra es que eir interes-sant da tratter differentas fuormas da

scriver d'urant las lecziuns. Scu as scri-va l'istorgia normela, scu ün blog, ün text in ün chat o eir artichels da giazet-ta? Que do simplamaing bger da dis-cutter.

Es quist crimi impustüt ün cudesch per l'instrucziun da puter? Na be, ma eir. Eau vögl simplamaing cha giuvenils puters hegian bunas lec-ziuns da lectüra, e nu stöglan adüna ler istorgias in oters idioms. Eau am gia-vüsch pella magistraglia putera chi det-ta dapü schelta e dapü temas chi per-mettan discussiuns sur da litteratura putera fatta per giuvenils.

Ma ad Ella esa consciaint ch'Ella ho scrit ün cudesch per üna minorited illa minorited? Haiai, ma que nu fo inguotta. (ria) Eir la minorited da la minorited stu ler qual-chosa a scoula.

La vernissascha dal cudesch ho lö mardi, ils 25 da november, a las 19.00 i'l bistro Serlas Viva a S-chanf – cun prelecziun, discuors ed accompa-gnamaint musical dal ghitarrist Fabio Camichel. L'entrada es libra. Cun maisa da cudeschs ed ape-ritiv.

Gianna Duschletta: Affers da famiglia. 80 paginas. Chasa Editura Rumantscha 2025.

«Sü Ü» – üna creaziun collectiva

La Gruppa da teater Scuol preschainta d'urant las ultimas duos fins d'eivnas da november üna cumedgia drammatica cul titel «Sü Ü». Il toc han sviluppà las acturas ed ils acturs svesa insembel culla redschissura professiunala Annina Sedlacek.

Far üna gita e lura pernottar in cha-monna – quai ha la taimpra dad aven-türa, da romantica o l'impromischiun da quietezza dalöntschi davent da la ci-vilisaziun. Mo che capita scha differen-tas personas chi nu's cugnuschon sun

dandettamaing serradas aint in üna chamonna, sainza savair cura e scha in-somma ch'ellas rivan darcheu da tilla bandunar? Precis in quista situaziun as rechattan las protagonistas ed ils pro-tagonists dal toc da teater «Sü Ü».

Üna grond'ouvra d'art Pella rapreschantaziun da quist on ha bandunà la Gruppa da teater Scuol sia zona da confort. Impè dad imprend-der text per üna rolla dad ün toc da teater existent, haja gnü nom: No sviluppain svesa ün toc teater. Sustegn han survgni las acturas ed ils acturs laics dad Annina Sedlacek. La Sentinra ha absolt la scoula da teater Accademia Dimitri a Verscio i'l Tessin e lavura sco redschis-

sura ed actura professiunala. «D'urant mia scolaziun vaina adüna sviluppà sves nos tocs, eu deriv dimena da quel muond», quinta Annina Sedlacek. Dad elavurar ün toc da teater nouv ha avantags. Uschea as chatta per minchü-na e minchün üna rolla adattada. «I's po viver oura alch chi nun es dat avant, uschea daja eir daplü spazi per sponta-nità ed improvvisaziun, quai chi'd es plü dastrusch a la vita da minchadi», de-clera la redschissura. Quista fuorma da teater detta implü la pussibiltà a las acturas ed als actuors da giovar üna jada üna figüra chi's tscherna svesa. «Üna creaziun collectiva significha eir cha la creatività da minchüna e minchün vain promovüda e cun quai daja üna grond'ouvra d'art», disch la redschis-sura.

Co tgnair oura cumünanza? Da s-chaffir ün toc da teater svesa es eir üna sfida. La sfida pella redschis-

sura es da propuoner bunas tematicas per improvvisaziuns. La sfida pellas acturas e'ls acturs es da's laschar aint sün alch incuntschaint e da's fidar cha quai grataja a satisfacziun. Al cuman-zamaint es qua be ün'idea ed intuorn quella naschan figüras, scenas e l'ul-tim ün'istorgia cun üna dramaturgia e forza eir cun ün messagi chi vain pre-schantà al public. Anna Mathis es suprastanta da la Gruppa da teater Scuol. Ella disch: «Id es üna sfida da fabrichar sü ün toc in passins, da nu savair al cuman-zamaint che chi'ns spetta». I nun haja dat quista jada ün script per as tgnair landervia ed il fil cotschen saja larg. Ma las prouvas sun tenor l'actura adü-na fich divertentas e tuots imprendan üna pruna. «No sco gruppa da teater badain chi va eir oter e cha no tuots eschan buns da'ns laschar aint sün quist experimaint flot», manaja Anna Mathis.

Bler spazi per situaziuns comicas I'l toc «Sü Ü» vaja insè pella dumon-da: Co as tegna oura üna cumünanza schi nu tilla s'ha tschernüda e nu tilla as po bandunar? Chi va intuorn in che maniera cun üna situaziun da cri-sa? Mo i va eir pel tema brisant da las catastrofes da natüra illas munto-gnas. Quai chi tuna pesant ha bler po-tenzial per situaziuns comicas. La li-gerezza s-chaffischan las acturas ed ils acturs cun giovar cun limits, cun exa-geraziuns, clischès ed eir cun chant. Las figüras van per part in ün extrem chi para ridicul e precis quel extrem muossa las deblezzas e fermezzas umanas. (fh)

La Gruppa da teater Scuol invida a las rapreschan-taziuns chi han lö als 22 da november a las 20:00, als 23 da november a las 14.00, ed als 28 e 29 da november a las 20.00 in sala cumünala a Scuol. Bigliets as poja reservar adüna la saira da las 18.00 a las 20.00 suot il nomer 079 781 93 87. O lura a la chascha avant la rapreschantaziun.

Arrandschamaints

Scolars güdan a scolars

Scuol Prossem venderdi, ils 14 no- vember, preschaintan scolaras e sco-lars da la Scoula Rudolf Steiner lur maisa da vendita davant l'entrada dal Bogn Engiadina a Scuol. Da las 9.00 fin las 12.00 spordschan els prodots da

l'üert da scoula ch'els han cultivà e conservà e pan fat sves. Il rechav da quist'acziun in occasiun da San Mar-tin, va per part ad ün proget d'agüd e sustegn da giuvernils a Campala in Uganda. (protr.)

Not da las istorgias

Scuol La not da las istorgias tocca cun 750 occurenzas minch'on pro ün dals plü gronds arrandschamaints cul-turals da la Svizra. Fingia daspö plü co 30 ons han uffants, giuvenils e cre-schüts la pussibiltà da passantar ün'agreabla saira da cumpagnia. Quist on ha lö l'occurenza cul motto «viadi in ün oter temp!» Perquai invi-da la Biblioteca populara Scuol a tuot

ils uffants da far ün viadi i'l futur culs trais ??? Patrizia Meng legia in ven-derdi, ils 14 november, da las 17.30 fin las 19.00 our dal cudesch «Ils trais ??? ed il muglin palantin» ch'ella ha tradüt per rumantsch. L'occurenza il-la Biblioteca populara a Scuol es adat-tada per uffants davent da la prüma classa. A la fin daja per tuots amo üna marendina. (protr.)



«Sü Ü» giova in üna chamonna chi'd es dandettamaing isolada dal rest dal muond. fotografia: Gruppa da teater Scuol